

Mei 13, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

WKF contento cu recaudacion di 20 mil florin via Aruba Bank su Golf Invitational

pagina 6



Conocido reportero/fotografo

Djispie Franken a bay sosega

DESPUES di un largo enfermedad ayera tardi, nos a haya e tristo noticia, cu e conocido reportero-fotografo Djispie Franken a fayece nae dad di 78 años. Su nomber oficial ta: Aloysio Marcolino Franken, y pesey tur hende ta puntra, di unda Djispie a sali? Esey no ta importa mas, pero el a sa di haci sum es conoci como tal.

Djispie tabata hopi dia malo, pero su curazon tabata fuerte, pero el a scoge net Dia di Mama p'e bay for di e mundo aki. Djispie ta conoci pa su mas di 35 años di servicio den su profesion p'e vespertino Hulandes, Amigoe. Pa su añanan di servicio,

Djispie a haya condecoracion real y Len-snan di Mi Wowo tambe a honra su persona. E tabata gusta e slogan: Er is geen gevaar, want Djispie is daar. Despues di retira como reportero/fotografo, el a dedica na negoshi, esta Djispie's, unda hunto cu su amigonan, Ety Toppenberg a haci tur diabierna un atardi ameno di Happy Hour.

Maske cu e no tey cu nos mas, hamas e lo ser lubida. Cu Djispie sosega na paz. Condolencia ta bay na su señora Cecilia, yiunan Susie, Setty y Pipi y na tur demas famia. Acto di entierro lo tuma lugar diarazon atardi.



= exact

Business Processes

Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Solutions for Finance, Manufacturing,
Wholesale Distribution, Professional
Services, HRM, CRM and BPM

Supporting all
your business activities

Our goal is to understand and anticipate your business requirements. It means that everything we do is geared towards equipping you with solutions that will help you succeed as markets evolve

VCC
International NV

Exact. And it all comes together.

Tel: 583-7072 | info@vcc.int.com | www.vcc-int.com



INVEST
SECURE

We don't just say it ... We Guarantee it !!!


ASIS
INTERNATIONAL

Advancing Security Worldwide®

Your security protection
partner since 1996

Tel: 582-7252

Everyone deserves a safe place to work,
live and play.



A detene Polis cu a wordo hinca siman pasa, sospecha di a saca arma di candela

E siman cu ta tras di lomba tawata tin un caso unda un dama a hinca un agente policial na Walishali, esaki a pasa den oranan di anochi.

Na yegada di patruya mesora a bay over na detene dama cu a hinca e agente policial.

E agente a bay Hospital y a haya tratamiento pa su herida. Ta un agente relativamente nobo den e Cuerpo.

E dia ey autoridadnan competente a presenta na e cas hunto cu BFTO pa cuminsa investiga.

Dia di e incidente a mira un banda di medaya so, esta cu ta e dama a hinca e agente.

Pero segun dianan tawata pasando y durante interrogacionnan di parti Recherche a sali na cla otro cos.

Berdad e anochi eynan e dama a usa un cuchiu pa sea defende su mes y ta hinca e agente cu ta e tata di e yiu cu nan tin.

Pero, awor a bin sali na cla cu e agente a saca su arma reglamentario y lo a dirigi esaki ariba e dama.

Aki ta unda cu e departamento di BIZO a cay aden, BIZO ta e departamento cu ta trata y investiga casonan cu agentenan policial comete infraccion o sea algo robes.

Despues di e scucha e banda di medaya di e dama y cu na su turno a entrega keho contra e agente a bay over na detene e agente. Pues segun nos a compronde, e agente lo a wordo deteni y ta encarcela pendiente mas investigacio.

Parse cu e pareha aki ya basta tempo tin manera un tension entre nan, debi na posibel jaloersheid. Y lamentablemente siman pasa e situacion a bay completamente for di man.

Awor ambos ta deteni.

Parehanan cu ta jaloers ariba otro mester sinta y analisa nan situacion y asina evita tipo di casonan manera esaki.

Tin cu ta caba te na morto.

Pense bon y actua of busca ayudo cerca un Profesional prome cu ta laat. Cuerpo policial no ta pasando den su miho momentonan, constantemente di esnan mas halto te na esun di mas abou ta hayanan den un of otro baina.

UE ta kita Aruba, Bermuda, Barbados for di lista preto

Union Europeo lo elimina Aruba, Bermuda, y Barbados for di su lista preto di “tax haven” pasobra a keda proba cu nan ta cambiando nan leyman di impuesto corporativo.

Minister di Finanza di Union Europeo lo aproba pa kita e nombernan aki for di e lista preto durante un reunión cu lo tuma luga dia 17 di mei awo.

Bou di leyman pa criterianan corporativo husto di impuesto, un compania mester tin un “base económico” den e país en cuestión, y no mester ta simplemente un adres cu a wordo crea pa saca ventaha di leyman di impuesto pa incorporacionnan cu no ta paga casi nada na impuesto riba nan ganashinan.

Na opinion di Hulanda

Evelyn Wever Croes no tin ningun autoridad pa sera frontera

Hulanda tin un solo frontera

DEN fin di siman, topico di combersacion tabata cu ki autoridad Prome Minister di Aruba, Evelyn Wever Croes a actua dor di anuncia cu Aruba lo mantene frontera sera cu Venezuela. Dia cu mester a discuti esaki, tabata Minister di Relacion Exterior Stef Blok mester a biaha pa Venezuela pa discuti e topico aki.

Segun informacionnan recibí Merca cu un yamada urgente na Gobernantenan Hulandes di Relacion Exterior pa tuma accion, pasobra no na ta Gobierno di Aruba pa bisa y dicidi cu frontera ta keda sera.

Hulanda ta hopi rabia pa actitud di Gobernantenan di Aruba.(MePoRed). Gobierno di Aruba no tin ningun derecho pa sera ningun frontera, pasobra relacion exterior ta competencia di Gobierno di Reino. Aparentemente Evelyn Wever Croes mester a consulta cu Hulanda y lo no a haci esaki. Loke ta sali na cla y hasta Washington Post ta haci mencion di dje, cu aparentemente den Gabinete Wever-Croes lo tabatin Minister cu a bin ta negocia cu Vice Presidente Venezolano, Tareck El Aissami pa habri e fronteranan bek, pero pa Aruba. Pesey na Venezuela nan a keda sorprendi cu e decision di Prome Minister Evelyn Wever-Croes di no kier habri e frontera y a pospone esaki cu un luna mas.

Manera a ser bisa pa autoridadnan di Reino Hulandes, tin un solo frontera y esey ta entre Reino y Venezuela. No ta papia aki di un frontera apart entre Aruba y Venezuela.

Esaki ta segun Prome Minister Eugene Rhuggenaath di Corsou hunto cu Reino riba e anuncio di e Vice Presidente y Minister di Asunto Economico di Venezuela, Tareck El Aissami, cu e fronteranan entre Venezuela y Brazil y tambe cu Aruba entrante diabierna, a keda habri “riba instruccion di Presidente Nicolas Maduro.”

Ministerio di Relacion Exterior na Den Haag a enfatisa cu un solo frontera ta conta pa tur e paisnan den Reino. Fuera di esey Reino no por haci nada riba e base di un aviso oral. “Pa loke ta trata nos, e frontera por lo tanto ainda ta cera,” Prome Minister di Corsou a laga, kende a agrega cu “esaki ainda ta wordo resolvi.”

Pesey e decision di Gobierno Venezolano ta ser mira como un posibel intento di dividi y goberna cu respecto e islanan di Caribe Hulandes, y solamente autoridadnan di Aruba a ricibi un compromiso di “respet, solidaridad y cooperacion”.

El Aissami a declara cu hasta el a yama “en particular e Prome Minister di Aruba”, Evelyn Wever-Croes (MEP), kende lo mester a enfatisa cu ta trata di “asuntonan interno (Venezolano).”

Esaki no ta aplica ne otro dos islanan, e Vice Presidente a bisa refiriendo na Corsou y Bonaire.

Cu respecto Aruba, lo haci un trabao di inmediato pa reestablece e relacionnan. P.e., e comitenan por traha y El Aissami a declara cu Venezuela lo reanuda e “48 buelonan semanal” pronto.

Gobierno di Nicolas Maduro kier “aumenta” e inversionnan den petroleo na Aruba y a señala e importancia di esaki p’e isla, cu segun e, ta depende den gran medida di e comercio entre e dos paisnan.

E paisnan aki, esta Aruba y Brazil tambe lo a priminti cu nan no lo interferi cu “asuntonan cu mester wordo regla p’e Venezolanonan.”

Como cu tin un frontera, tambe tin un solo politica exterior cu ta wordo aplica p’e 4 paisnan di Reino: Hulanda, Corsou, St. Maarten y tambe Aruba.

E Relacionnan Exterior ta un asunto di Reino, den e caso di Minister Stef Blok (VVD), kende a bishita Willemstad y Oranjestad recientemente, despues di un consulta conhunto na Philipsburg.

E Vice Presidente Venezolano a declara den un sentido general cu e blokeo lo wordo manteni te ora cu “e actitud di hostilidad y agresion stop di existi.”

E blokeo cu Corsou y Bonaire ta referi n’e trafico maritimo y aereo y e frontera cu respecto Colombia, lo keda sera.

Di repente e islanan ABC ta bolbe bira noticianan mundial. Tanto e agencianan di Reuters como Associated Press (AP), pero tambe New York Times y naturalmente, e medionan Hulandes, a informa al respecto.

“Nos ta spera cu sabiduria prevalece entre e autoridadnan die otro islanan,” AP ta cita e Minister Venezolano.

“Y evita cu nan converti den instrumentonan di agresion contra e teritorio di e Republica Bolivariana di Venezuela.”

Na Corsou tin e suministro Mericano di ayudo humanitario cu Maduro no kier tin na Venezuela. Colombia a yuda n’e intento di Juan Guaido di lansa un campaña di ayudo di emergencia, despues cual Caracas a suspende tur vinculo cu e pais.

Pero decenas di pais a sigui den su mayoria occidental, incluyendo Reino, pero tambe e mayoria di e paisnan Suramericano uni den e Grupo de Lima, reconociendo Juan Guaido como Presidente di Venezuela.

Raad a ratifica decision di retiro pa ambtenaar di DOW cu a yuda horta klinker

Raad van Beroep den Ambtenarenzaken recientemente a ratifica un decision cu a wordo tuma anteriormente door di Gerecht in Ambtenarenzaken, dia 15 di februari 2016, unda cu un ambtenaar a wordo kita na trabou pa robo di klinkers.

Dia 19 di juni, 2015 e ambtenaar en cuestion a haya e castigo disciplinario di retiro y entrante e fecha ey “eervol ontslag” pa motibo di no ta adecuado pa e funcion cu e tabata ocupa. Ora cu el a bay Corte contra e decision aki, e decision tabata cu su obheccion no tabatin base.

Asina mes e funcionario aki di DOW a dicidi di apela e decision y su caso a wordo trata door di Raad van Beroep den Ambtenarenzaken dia 15 di november, 2018.

E ley di ambtenaarnan ta bisa cu nan mester cumpli cu tur nan debernan, segun e reglanan stipula. Y como tal mester comporta su mes manera cu ta spera di un bon ambtenaar. Un di e reglanan ta bisa cu ta prohibi pa e ambtenaar haci uzo di materialnan di Gobierno pa otronan. Si e viola e regla aki, por tuma medida disciplinario contra dje.

E persona aki ta traha desde 2004 como ambtenaar, den funcion administrativo na DOW. T’asina cu dia 3 di september, 2014, entre 11’or y 11.30 di mainta, sin cu e tabatin un ordo pa haci esey, el a presenta na e deposito di DOW na Tarabana y cu intento pa horta klinkernan, door di hunto cu un contratista hinca esakinan den pick-up di e persona aki pa uzo priva.

Corte a conclui cu e investigacion haci door di DOW a duna suficiente base pa demonstra cu e no a cumpli cu su deber y cu e castigo imponi no ta inhusto.

E funcionario ta nenga cu el a trata di horta e klinkernan di caya. E ta nenga di tabata sa cu e contratista no tabatin permiso pa bay cu e klinkernan, pa cual no por acus’e di robo, segun su defensa.

Pero Raad ta bisa cu a base di memonan interno di DOW di dianan 5 y 8 di september, 2014, por conclui cu e funcionario a bay na e sitio y a yuda e contratista yena su pick-up cu klinkers mientras cu e tabata sa cu



eseynan tabata pa uzo priva, cu otro palabra a horta e materialnan aki. E hecho cu e ambtenaar ta nenga esaki, no ta creible pa Raad. Nan ta basa nan mes riba e declaracionnan contradictorio cu el a duna. Prome el a declara cu el a yuda e contratistanan pone e klinkernan di e auto, mientras cu den apelacion el a bisa cu e klinkernan tabata den e pickup caba, ora cu el a cana bay na e auto pa papia cu e homber.

Tambe Raad ta bisa cu e declaracionnan di e colega y e contratista ta cuadra pa loke ta e uzo final di e klinkernan, ta muestra cu e ambtenaarnan tabata sa cu nan tabata bayendo cu e klinkernan sin permiso. Pues el a yuda pa horta material di Gobierno, y si esaki tabata p’e of of e contratista no ta importa.

Su ponencia cu e klinkernan ta di poco balor, pa cual e daño di Gobierno no ta grandi pa cual e retiro ta un castigo demasiado pisa, no ta algo cu Raad por bay di acuerdo cun’e.

Tin motibo pa e doño di trabou no tin confiansa mas den e actuacion integro di e apelante como ambtenaar. Mas ainda pasobra e no ta acepta su rol den e sucedido. Pa e motibo aki Raad ta bisa cu su retiro no ta un medida desproporcional. Cu e otro dosnan involvi no a haya e mesun castigo cun’e, no ta hunga un rol den decision di Raad. E contratista no ta un ambtenaar y e rol di su colega den e sucedido di e klinkernan no tabata mucho cla, pa cual ta comprendibel cu e no a wordo retira.

Final di cuenta ta cu e retiro di e funcionario di DOW ta keda valido.

Gang di Sabana Basora a horta 17 mil den un luna



Jorge Antonio Ramirez, Joander Antonio Alexander Ramirez, Arold Clement Santos Ramirez y Jerleyne Shallenne Dirksz hunto a forma un grupo cu a comete un serie di atraco durante e periodo di 19 di september pa 7 di october, 2018. Si no tabata pa e hecho cu nan a wordo deteni e atraconan aki a sigui.

Pues por mira cu e no tabata ni un luna completo pero den e periodo aki a horta un suma di casi 17 mil den e diferente atraconan. E placanan no solamente a wordo horta for di e negoshinan pero tambe di clientenan cu tabata presente durante e atraconan. Den un solo di e atraconan, riba un truck, a bay cu tas di e empleada, den cual e tabatin mas cu 4 mil dollar, cu el a cambia pa un amigo di dje cu mester a biaha. Awo e empleada aki a keda cu un debe, pasobra e hobennan no tin caminda di cay muri corda pa paga e debe aki.

Tambe nan a bay cu un caha cu tabata contene diferente carton di cigar y esaki tabatin un balor di 3500 florin. Kico nan a haci cu tur e placa aki no ta conoci, pero no a haya nan cu nada di efectivo.

Durante e atraconan a bay cu diferente celular, cu nan a regala famia y un di nan a keda den man di un di e acusadonan. El a hinca un chip nobo den e celular y asina dado momento Polisnan a constata cu e celular ta den uzo.

A pidi y a haya permiso di autoridad concerni pa “tap” e telefon aki. Asina a bin saca afo cu e grupo ta den area

di Sabana Basora. Nan a papia di un Alteza cu no tabata core. Cu e datonan aki Recherchenan a cuminsa peña e area y a yega na cas di Arold Santos Ramirez y for di eynan e investigacion a avansa.

Pero na mita caminda nan a bin descubri cu nan tabata wordo scucha pasobra e telefonnan tabat a haci straño. Pero ya caba autoridadnan tabatin suficiente informacion pa cuminsa detene nan. Un di esnan cu a wordo treci dilanti mesa tabata un menor di edad, pero el a wordo declara liber den e casonan di atraco, pasobra su envolvimento tabata basa riba “horen zeggen”. Pues no tabatin prueba concreto cu e tabata involvi. Diabierna mes e por a bay cas.

Fiscal a bisa den su rekisitorio cu e maximo di castigo pa un serie di atraco asina ta 16 año. Pero como cu nan no ta recidivista, no a pidi un castigo di e indole. Pa esun cu a hunga un rol principal, cu ta Jorge, el a pidi 12 año cu ta un castigo basta pisa. Pa Joander, kende tabata su asistente, a pidi 10 año. Pa Arold, kende tabata manera un “bijloper”, y kende fiscal ta sinti ta bou presion di e otro dos acusadonan, a pidi un castigo di 8 año.

Y pa chauffeur, e mucha muhe Jerleyne, el a pidi 4 año. Si Hues bay di acuerdo, e mucha muhe aki, kende ta liber awo, lo mester bay KIA bek lagando un yiu di 3 año y un baby di 4 luna bieu bou cuida di nan wela. Dia 29 di mei tin sentencia den e caso aki.

Aruba Bank Golf Invitational 2019 a recauda 20 mil florin pa WKF

PA di cinco (5) aña consecutivo Aruba Bank ta organisa su torneo di golf anual (Golf Invitational) cu meta pa recauda binti (20) mil florin pa yuda Wilhelmina Kanker Fonds.

Clientenan corporativo y aficionado di deporte di golf na Aruba a forma un total di trinta y dos (32) ekipo cu a participa den e 4-man scramble.

E evento anual tin un demanda hopi halto y e inscripcionnan a yena den un tempo record, contando cu cien y binti ocho (128) participante.

E weganan a tuma lugar riba canchanan di Aruba su tan conoci Tierra del Sol Golf Club.

Despues di wega tur participante a pasa p'e recepcion rond di piscina di Tierra del Sol, caminda cu e Director di Golf Operations di Tierra Del Sol, sr. James Kiley a presenta e resultadonan y a comparti esakinan cu esnan presente.

Na prome lugar a keda e ekipo di Wayaca Service Station: Axl Ismail, Alexandra Brown, Ross Ismail y Oslin Ismail. Na di dos lugar a keda e ekipo di Holiday Inn: Eddie Rivera, Kevin Anderson, Martin Giraldo y Luigi Wix. Closest to Pin front half a keda den persona di Orlando Rasmijn y back half a keda den persona di Tariq Welhouse.



E "Hole-in-One" a wordo presenta pa Aruba Bank Mastercard Debit Business un oportunidad pa gana US\$100,000.00. A introduci e "Second-Hole-in-One" cu e oportunidad pa gana un Hyundai Santa Fe. A duna oportunidad na 5 golfista pa tira un Hole-In-One on the spot pa gana e premio grandi.

Managing Director sr. Michiel Helfrich y Executive Director sra. Gina Habibe a haci entrega di e cheque cu e suma di binti mil florin na representantenan di Koningin Wilhelmina Kanker Fonds.

Pabien na tur e participantenan y sigur e ganadornan cu a hunga un tremendo wega diasabra ultimo y ta sigui apoya Aruba Bank pa logra e meta di sigui sostene esfuersonan caritativo den nos comunidad!

BO MESTER DI WASTE BUCKET RESIDENCIAL OF COMERCIAL?

ecotech

YAMA

Mr. Bucket

594-3757
mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

AHATA a observa cu

High Season largo di 2019 ta trece menos ocupacion na april, pero mas entrada



Aruba Hotel & Tourism Association (AHATA) a acumula e cifranan di ocupacion y prijs di hotelnan pa luna di april 2019 y e CEO di AHATA, Tisa LaSorte, a anuncia cu april tabata un luna inusual pa motibo cu Pasco Grandi a cay laat.

Cu un High Season mas largo, e ocupacion ta baha p'e prome simannan den luna. Di otro banda ta cobra prijs di high season pa 3 siman den luna di april, mientras cu aña pasa henter e luna a cobra prijs di low season.

Na april 2019 Aruba a experiencia un porcentahe averahe di ocupacion di 82.6% cu ta 5.8 punto menos cu aña pasa.

E balor averahe di cada kamer (ADR) tabata \$288.04, cual ta 19% mas halto cu na 2018. E RevPAR, cu t'e entrada averahe pa tur kamer disponibel, na april 2019 tabata \$237.85 y esaki ta un aumento di 11.1% compara cu un aña pasa, pero un reduccion di 21% di maart 2019.

E cifranan di AHATA ta basa riba 17 hotel miembro: Amsterdam Manor Beach Resort, Barceló Aruba, Boardwalk Hotel, Brickell Bay Beach Club, Bucuti & Tara Beach Resort, Divi & Tamarijn All-Inclusive, Eagle Aruba Resort, Holiday Inn Resort Aruba, Hyatt Regency Aruba, Manchebo Beach Resort, Marriott Aruba & Stellaris Casino, The Mill Resort, Renaissance Aruba Resort, The Ritz-Carlton, RIU Palace Aruba, RIU Palace Antillas y Talk of the Town Hotel.



4 years free service

L200 Sportero



Get the toughest jobs done in a stylish and comfortable pick-up.

- Easy select 4WD • 2.5liter IC T/C DI Diesel engine
- Hands free & Voice control system (Bluetooth) & USB port
- Display audio • Rearview camera • Keyless operation system & Engine start switch • 17" Alloy wheels incl. spare • Side steps
- L.S.D (Hybrid type) • ABS with EBD • Front fog lamps
- HID headlamp (Projector type) w/ LED DRL

[Book test drive](#)

524 4444
info@yerausquin.com
www.yerausquin.com
f yerausquinaruba
@yerausquinaruba

YRAUSQUIN

Un mucha muhe na estado tabata chauffeur di atracadonan

UN caso penal trata diabierna ultimo a mostra e problemanan cu hubentud ta pasando aden y con nan ta hinca nan mes den problema pa miedo of pa cosnan mudano.

Jorge Antonio Ramirez, Joander Antonio Alexander Ramirez y Arold Clement Santos Ramirez,. a participa hunto den casi tur e 6 atraconan cu ta para riba nan dagvaarding den Corte. Nan a wordo compaña Jerleyne Shalenne Dirksz., un mucha muhe di 22 aña, compaña di Jorge Ramirez. E tabata un mama di un mucha di 2 aña y tabata na estado di basta luna caba.

E mucha muhe hoben aki for di momento cu el a wordo deteni na luna di october, a basha'bou y awo den Corte a bisa cu e no ta Jorge mas. Den e declaracionnan cu el a duna por saca afo cu e tabatin manera un miedo di Jorge. "No cu el a dalmi, pero el a menasa di dal mi. Y mi tabatin hopi miedo cu e haci esey," tabata palabranan cu el a expresa.



Asina por ehempel, un biaha cu e mester a actua como chauffeur, el a bisa Jorge cu e mucha di 2 aña ta malo y cu nan mester bay Centro Medico cun'e. Pero pa Jorge esaki no tabata importante. Loke tabata conta e dia ey tabata pa nan bay San Nicolas y busca e persona cu supuestamente a horta e arma di candela cu el a sconde bou corchon di Jerleyne.

Ademas por a scucha con por ehempel, e acusado femenino aki tabata para dilanti misa na Tanki Leendert y na Pos Chiquito, mientras cu Jorge y su amigonan a bay atraca Tur Dia Supermarket y Rey Hing Bar Restaurant. Na un otro atraco, nan a haya discusion, pasobra e tabata sinti dolor na su bariga, y asina mes Jorge a obligue pa stuur e auto pa nan. "Nos mester placa pa cuminda," Jorge a presion'e. Su reaccion tabata "si bo mester placa, bay traha". Pero mas rabia esaki a causa cerca Jorge, kende e ora a menasa cu e lo dal'e.

Placa cu e hobennan a bay cun'e durante e atraco (cu tabata rond di 17 mil florin), ademas di cuminda, a wordo gasta den casino, cu nan ta bishita regularmente, y paña. Segun e mama hoben aki, di e atraconan e no a haya ningun placa den su man. Hasta el a compaña Jorge bay Playa compra paña y e no a compra nada p'e.

Sinembargo apesar di su rol chikito, Fiscal a bisa cu e no a presenta prueba cu e tabata bou menasa y presion di su pareha. "Mi a tene cuenta cu tur bo situacion. Pero e delitonan cu a wordo cometi tabata hopi serio. Hasta tiro a cay un biaha. Mi no por pidi menos cu 4 aña pabo," Fiscal a bis'e.

E demanda di fiscal a cay pisa p'e, ya cu dado momento el a wordo laga liber pa e por atende cu su baby recién naci cu e mester a duna pecho. Diabierna mainta mes, e mester a bini Corte cu su mama y baby, kende cada dos ora e mester a duna pecho. Y te rond di 7'or di anochi, ora e caso a finalisa, el a bay cas.

Dia 29 di mei awor lo tin sentencia den e caso aki.



**TIMESHARE
FOR SALE BY OWNER**



**UNIT # 304 – WEEK 32
1 BEDROOM DELUXE SUITE
SLEEPS 5 PEOPLE**

- 2 X QUEEN BEDS
(1 IN BEDROOM & 1 PULLOUT BED IN LIVING ROOM)
- KITCHENETTE
- 3RD FLOOR
(BALCONY VIEW OVERLOOKING THE RESORT)

PRICE: \$5,500

**INTERESTED PLEASE CALL 583-1400
DURING OFFICE HOURS**

Parlamentario Mike de Meza

Prome Minister Evelyn Wever Croes a confirma cu no ta bay sigui cu reapertura di refineria



DEN forma categorico Prome Minister Evelyn Wever Croes, a muestra cu su Gobierno no ta interesa den sigui cu e proceso di reapertura di e refineria na San Nicolas ora cu el a declara siman cu a pasa, cu nan lo bay Merca y haci ultimo intento pa logra esaki.

Miembro di fraccion di AVP, sr. Mike de Meza a muestra cu ya caba el a muestra riba esaki anteriormente, esta cu Gabinete Wever Croes lo keda na bisa solamente si bay di acuerdo pa no laga e refineria habri.

“Nos a bisa bon cla caba, cu existencia di coalicion MEP-POR-RED a depende di e refineria ya cu e partido mas grandi den e coalicion aki, tin cu bay na amen di e partido POR su lider, kende kier mira su proyecto di hotel na San Nicolas wordo ehecuta.

Siman pasa caba Prome Minister a muestra malo ora cu Corsou si a logra na yega na un acuerdo cu Departamento di Estado Mericano, pa coopera p’asina PDVSA por los fondonan cu tabata necesario p’e sigui funciona.

Esaki a wordo logra a base di esfuersonan haci pa tanto Gobierno di Corsou como otro expertonan envolvi cu a percura pa haya un solucion p’e problema cu tambe tabata afectando e refineria di Corsou.

Sinembargo aki na Aruba tabata bisto cu Gabinete Wever Croes no tabatin nocion di loke nan tin cu haci, no tabata sa nada, pero net nada di e refineria, ya cu nunca antes nan a pone atencion n’e proceso aki y solamente a haci politica barata cu e proyecto aki.

Awor algun dia despues cu Gobierno di Corsou a anuncia cu el a yega na un solucion cu autoridadnan Mericano, di repente Prome Minister Wever Croes ta declara c’un delegacion di Aruba lo sali rumbo pa Merca pa haci ‘ultimo’ intento pa logra haya un solucion p’e refineria di Aruba.

Pero aki tin cu pone bon atencion n’e hecho cu ningun hende sa kendenan ta forma parti di e delegacion aki, no ta conoci si tin representantenan di CITGO den esaki, pues ningun hende sa kico e delegacion misterioso aki a bay haci.

Prome Minister no a duna informacion concreto di kico e mision di ultimo recurso aki ta bay trata di logra, pero si ta bisa cu esaki ta ultimo intento, loke nos ta kere cu aki poco dia Gabinete Wever Croes lo bin bek y anuncia cu e proceso di reapertura lo termina.

Fuera di e bishita kamikaze aki cu Prome Minister ta manda Merca,

a keda confirma siman pasa ora cu e documento di e plan economico di Gobierno a wordo presenta, no ta menciona ningun caminda algo riba e refineria, pues e refineria no ta conta den e plan economico di Gabinete Wever Croes, pero Prome Minister ta sigui hunga su comedianan y ta sigui gaña pueblo, segun Mike de Meza.

E momento a yega pa Prome Minister bin dilanti y bisa pueblo e berdad, sikiera pa un bes desde cu el a bira Minister Presidente, sea sincero cu pueblo y bisa tur hende cu refineria di San Nicolas tin cu sera pa cumpli cu exigencia di lider di POR cu ta decidido pa ehecuta e plan di construccion di un hotel na San Nicolas.

Futuro di Evelyn su Gabinete ta depende di e decision aki ya cu si no cumpli cu e exigencia di e lider blau, Gabinete Wever Croes ta bay cas y tur cos a caba pa Prome Minister.

E falta di sinceridad aki, e falta di respet pa pueblo di Aruba, ta sigui manifesta su mes mas tanto den maneho di e pais, caminda tur hende por bisa e balor economico di logra reapertura di e refineria, kico e lo notica no solamente den e aspecto economico, pero tambe pa loke t’e aspecto laboral, pero awor tur esaki ta bay perdi ya cu interes politico di partido MEP, manera semper ta bin na prome lugar, prome cu interes di nos pueblo, Parlamentario Mike de Meza a declara.

Parlamentario Edgard Vrolijk (MEP):

“Parlamento tin e poder pa haci e cambionan necesario den ley di LAFT”



DIA 1 januari 1986 Aruba a logra su Status Aparte unda cu porfin nos por a papia di ta Baas in eigen huis y cu nos mes por a dicidi riba nos mesun finansa (autonomia financiero). Pero lamentablemente di 2009 pa 2017 Aruba a conoce un maneho financiero desastroso na unda cu nos debe nacional cu tabata core den 40% di nos GDP (2.2 biyon) cu a ser acumula den 23 año dor di diferente gobernacion,

AVP bou guia di Mike Eman den solamente 8 año a sa di redobla esaki y sin conta tur e proyectonan off balance manera Green Corridor, Watty Vos Boulevard y Hospital a conduci cu nos a conoce 90% di nos GDP na debe (4 biyon), segun Edgard Vrolijk.

MIKE EMAN Y SU KB

Na 2013 Hulanda a realisa cu Aruba su finansa publico ta bayendo den mal direccion. Aki ta unda a firma e Protocol di Diabierna Santo y unda cu Mike Eman a compromete di lo cumpli cu exigencianan di Hulanda pa por tin un finansa publico sostenibel y duradero. Pero na 2014 no a keda Gobierno di Reino nada otro cu duna Mike Eman un KB pa mal maneho financiero y cu CFT a bin haci su investigacion y unda a constata cu nos tabata den careda di 76% di nos GDP na debe. (Di cada florin 76 cen ta bay na paga debe).

LEY LAFT TA INCONSTITUCIONAL

Den e fase aki dia 2 di mei 2015 a firma un protocol unda cu pa no haya un CFT permanente manera di otro islanan, a opta pa traiciona e lucha pa Aruba por a haya su autonomia financiero.

Unda cu pa medio di un ley local conoci como LAFT, cu den consehonan di Raad van Advies a indica e tempo ey cu no por duna un organo Hulandes un autoridad pa por aproba un presupuesto di un pais autonomo den Reino. Y cu e ley ta inconstitucional.

Pero asina mes AVP a aproba esaki pa impedi cu nan lider Mike Eman un biaha mas lo a haya un KB y un supervision financiero permanente. Pueblo a lanta contra esaki y unda den e lucha aki hopi hende a ser mal bati, pero tin tambe cu a bay cera pa motibo di a para pa autonomia financiero di nan pais. Pero asina mes esaki a pasa.

UN BIAHA MAS E LAFT

Pueblo ta compronde cu pa mal maneho financiero di AVP, hasta cu CAFT presente, a sa di manipula y sigui crea mas debe y unda cu tambe pa falta di control debido di CAFT a crea mas debe y cu na 2014 e debe relata na GDP tabata 76% a finalisa den 90%.

Awor nos di Parlamento e siman aki a ser afronta cu e ley di LAFT unda cu un biaha mas esaki a keda inconstitucional, Edgard Vrolijk a sigui bisa.

“Den e weg aki lo mi no ta y no lo aproba esaki manera cu el a drenta Parlamento. Raad van Advies un biaha mas a papia bon cla cu e ley di LAFT ta inconstitucional. Nos di Parlamento tin den nos derecho e poder pa haci e cambionan necesario n’e ley aki y cu nos lo haci uso di e derecho aki tambe pa trece e cambionan necesario, p’asina aproba na final un ley cu ta constitucionalmente corecto.

Tur locual a bay krom bao di gobernacion anterior nos tin di corig esaki y sigur percura pa e no pasa nunca mas. Ta p’esey pueblo a scoge nos”, Edgard Vrolijk di MEP a conclui.

Melvin Tromp di AVP

Integridad tambe ta ora cu cumpli cu palabracion haci cu Hulanda

NA cantidad di ocasion Prome Minister Evelyn Wever Croes a papia di integridad y transparencia, insistiendo cu su gabinete tin e dos puntonan aki como su base di maneho di nos pais. Vocero di partido AVP, Melvin Tromp ta muestra cu mientras Prome Minister tin su boca yen cu e palabra di integridad y transparencia, su maneho ta net lo contrario di loke e palabranan aki a nifica.

“Tur hende por corda bon cla con Prome Minister na varios ocasion a musttra cu ‘ta haci bon ora hende ta mira, pero haci bon tambe ora hende no ta mira’ pero loke su persona como Prome Minister y su Gobierno ta haciendo cu pueblo di Aruba, ta increiblemente contrario di e ponencia aki.

Na prome lugar un Prome Minister cu a gaña su votadornan cu e lo tin solucion p’e situacion financiero di e pais sin cu e tin mester di tuma medida, pero ta haci net lo contrario y ta pak pueblo cu un medida tras di otro, ta un Prome Minister cu no tin integridad.

Un Prome Minister y su Gobierno cu a priminti pueblo di baha gasto di personal como parti di su maneho pa soluciona e situacion financiero di nos pais y ta wordo atendi p CAFT cu su Gobierno a subi gastu di personal cu 10 miyon florin, no por ta un Prome Minister of Gobierno cu tin integridad.

Un Gobierno cu a priminti pueblo reduccion riba prijs di gasolin, reduccion di tarifa di awa y coriente y net lo contrario ta sosode, nunca por tin integridad ya cu a gaña pueblo den mal forma usando cantidad di excusa barata cu awor no por wordo hustifica.

Transparencia ta algo cu Prome Minister semper ta papia di dje, pero te dia di awe ningun hende a mira e proceso di destaho pa compra di e helikopter pa Polis ya cu cosnan no a bay manera mester a bay, pero riba esaki net nada ta wordo bisa.

E priminti pueblo cantidad di cos, cantidad di alivio, un progreso sin discusion bou maneho di Gobierno di MEP, pero tur loke Prome Minister y Minister di Finansa ta pidi, ta pa pueblo tin pasenshi, pa pueblo compronde cu cosnan tin cu bira hopi malo prome cu cos bira bon. Un Prome Minister cu a para na porta di refinaria y grita di ora zero, cu su primo Minister Glenbert Croes a logra cu Gobierno Venezolano a bay di acuerdo pa sostene e plan di reapertura di e refinaria, awor ta haciendo ningun esfuerzo pa logra reapertura di e refinaria, pero mas tanto ta sigui e demanda di su colega Minister den coalicion, kende a exige pa su hotel wordo construi banda di e refinaria.

Mesun cos ta ora un Prome Minister bisa pueblo cu den 6 minuut



su Gobierno lo cambia e ley di castigo minimo den caso di abuso di muchanan menor di edad, pero kende te dia di awe no a haci net nada pa atende cu e situacion aki. Un Prome Minister integro lo cumpli cu loke el a priminti pueblo y den e caso aki e no a logra den esaki y ainda e situacion ta mesun cos, mientras cu e plan social di su Gobierno, no ta funcionando. Na luna di november di 2018 Prome Minister a bay di acuerdo cu Gobierno di Hulanda pa firma un acuerdo di CAFT nobo cu ta permiti permanencia di e comision di supervision financiero, sigui cu su trabou te cu 2021 y hasta a acepta cierto punto cu antes Gobierno di AVP a nenga di acepta.

Despues di a anuncia e acuerdo aki y a firma un protocol via di fax, te dia di awe ainda e ley aki no a wordo cambia y no a yega Parlamento, y ta siman pasa esaki a drenta porfin loke ta algo hopi serio. Un Prome Minister cu no tta conforme cu loke e mes a firma cu Gobierno di Hulanda, ta muestra di un falta di integridad y sigur ora cu e propio fraccion geel den Parlamento, a musttra bon cla cu nan lo no sostene e ley aki, mustrandu un biaha mas cu Prome Minister no tin integridad y tampoco transparencia, Melvin Tromp di AVP a declara.

Turista haya sin bida



DIASABRA marduga ya birando mainta polisnan a bay La Cabana, unda a bin topa un dama sin bida den un camber. Tawata trata di un dama rond di 50 aña. Segun nos a compronde elo a muri un morto natural. Polisnan a sigui e procedura y pa sigur a pidi pa un Dokter y tambe BFTO (departamento tecnico di polis). Slachtofferhulp a wordo avisa y a presenta pa asina duna e famia di e dama sosten moral y yuda den e tramitenan pa e curpa regresa su pais di origen.

Homber a maltrata muhe y a huy pa polis



DIASABRA marduga polis a wordo manda cu urgencia un adres na Sero Blanco, na unda un homber tawata maltratando su casa.





Tata di e dama tambe lo tawata na caminda pa e cas. Esaki a pone polis bay mas lihe pa asina evita algo grandi. Polis a yega pero ya e cas a bay for di e sitio, mesora cu ela tende cu polis ta biniendo.

E dama a conta polis cu e ta wordo maltrata door di di casa y ya no por soporta e situacion mas.

E tawata ocupa pikiendo su cosnan pa e bay for di e cas. Polis a splike pa e pasa warda di recherche y entrega un keho di maltrato contra e casa.

No ta tur dia bo ta scucha cu damanan ta bisa “Ta basta na maltrato”, esaki ta sigur algo di aplaudi.

Homber burachi a causa basta daño prome cu el a bolter cu su auto na Zeewijk



DIADOMINGO madruga esnan laborando den Kazerne di Brandweer na San Nicolas por a scucha un zonido hopi duro. E zonido a bin for di area patras di e Kazerne. A resulta cu un auto a bolter.

Mirando cu ta trata di un accidente serio mesora polis y ambulance a dirigi nan mes pa e sitio.

E auto cu a bolter tawata un Hyundai Accent. Segun nos a compronde e chauffeur muy probablemente bou influencia tawata biniendo for di pabou, cu velocidad hopi halto.

Door di e mesun velocidad halto ela ranca dos auto staciona y despues sigui bay dal un otro.


Autonan cu a ricibi daño tawata un Hyundai, un Mazda y un Eco Sport. Na final su auto mes a keda benta di banda.

Ekipo di rescate di Brandweer a yuda pa sake for di e vehiculo. E tawata musta basta zonza.

Paramediconan a atende cune.



Chauffeur a huy di e sitio di accidente



DIASABRA marduga pa mas o menos 4:50 polis a baya ariba e caminda di Nuñe, pa un Nissan Sentra color cora cu a dal un cura di cas.

Na yegada di polis enberdad nan a topa cu e auto cu a dal contra e cura di cas, pero e chauffeur a bandona e sitio.

Polis a nota cu e chauffeur durante e impacto a dal su cabes den e windshield, posiblemente heridando su mes tambe.

Den e auto e chauffeur a laga su pertenencianan atras, y tambe algun boter di cerbes indicando cu e lo tawata bou influencia.

Polis a tuma nota di tur cos y a bandona e sitio.



Despues di basta rato cu e patruya a bay e chauffeur a regresa y bay cu e auto.

Prome cu polis a yega bek ya e auto y e chauffeur a desaparece.



Un biaha mas luz di trafico for di funcion

Ta sosode accidente n'e cruzada di Palm Beach



DIASABRA anochi den careda di 11'or, un dalmento a sosode n'e afamado cruzada di Palm Beach, pa motibo cu pa algun dia caba e luznan di trafico a cuminsa traha fayó. Un rato nan ta traha bon y poco rato despues nan ta riba e luznan oraño cu ta keda cende paga.



Diasabra anochi un dama chauffeur di e auto Daihatsu shinishi a bisa Polis cu e no a mira e Mercedes Benz.

E Mercedes Benz bayendo nort a wordo gedal den banda dor di e auto shinishi. Ambos porta di e Mercedes banda di chauffeur no tabata habri, y e chauffeur mester a sali for di banda di pasahero.

Pa loko ta auto di e dama, esaki tambe a sufri daño grandi dilanti. Polis na yegada a controla ambos vehiculo nan documento y tur cos tabata na ordo.

E chauffeurnan a keda warda riba seguro. Ambos lo mester a wordo kita di caminda cu takelwagen, mirando cu nan no por a move mas riba nan propio forsa.

Por spera mas accidente riba e cruzada, dor cu e luznan di trafico a dañá atrobe. Ta chauffeurnan cu no ta pone atencion riba trafico, ta pesey accidente ta sigui sosode. No por bisa cu ta pa motibo di luznan di trafico. No tin un chauffeur cu kier cuminsa un test-case contra Gobierno? Y asina sa kende tin falta. Tim hende ta bisa cu ta tempo pa Gobierno pensa un solucion duradero, prome cu algo fatal pasa eyan.



Fundacion Bernadina ta anuncia edicion 7 di e festival dedica na Mama di Cultura

DEN conferencia di prensa, miembran di Fundacion Bernadina Growell-Kock a anuncia e di 7 edicion di Festival dedica na Mama di Cultura, Bernadina Growell-Kock. Mervin Wyatt-Ras a trece dilanti cu e Festival lo tuma lugar dia 8 di juni benidero anochi di 7-12 or den Centro di Barrio Brazil. Ya tin mas menos 20 inscripcion. Lo tin 7 grupo tipico cu lo compaña e cantantenan. Por inscribi ainda serca miembran di e fundacion, Lena cel. [565-1145](tel:565-1145) of Persey cel. [733-6007](tel:733-6007) te cu diamars awor dia 14 di mei.



Fundacion Bernadina Growell-Kock ta invita tur banda/tipico y cantantenan pa un di dos reunion informativo den Centro di Barrio Brazil diamars anochi dia 14 di mei di [7.30 - 9.00](tel:733-6007) or. Esnan cu kier inscribi por haci esaki ainda durante e anochi.

Meta di e festival ta pa duna sosten nan desaroyo di nos cultura y pa contribui na concientisacion di nos comunidad pa loke ta trata Mama di Cultura y su gran contribucion na nos folklore, cultura y arte.

E fundacion a yega di organisa diferente actividad y a coloca un re-

lieve na Paseo Herencia. Na varios ocasion ta expone e cas pa tur hende por bishit'e.

Mervin Wyatt-Ras ta invita un y tur pa bin presencia e grandioso festival aki y ta gradici p'e aporte cu ta ricibi di publico y sosten y presencia di prensa.

Persey Jeandor a splica tocante e forma di e festival y cual ta reglanan. Ta trata di cancionnan tipico, na Papiamento.

E ritmo mester ta local, p.e. wals, danza, mazurka, tumba y foxtrot. Mester ta na tempo pa training y festival, trahe mester ta cultural,

etc.

Lena a informa encuanto inscripcion. Sr. Chico Harms a trece padilanti cu den lunanan benidero banda di e festival lo prepara pa eleccion di baby, damita, dama y dama grandi cultural pa nan por guia e parada cultural cu lo tuma lugar den september benidero.

Sra. Lucia Thiel, sobrina di Bernadina a expresa con bon e ta sinti pa participa n'e festival. E t'e prome dama cultural di Brazil y ta contento cu e sosten di un cantidad di persona pa cu e festival.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta




583-1400



583-1444

Recherche a efectua varios detencion, entre nan tin algun atracador



DIABUEBS ultimo van di CEA a yega Warda di Recherche na Frankrijkstraat, den dje varios detenido.

Nan no a keda hopi, e motibo tabata e detenidonan aki mester a presenta segun nos a compronde cerca Polis Tecnico.

Tur lo a wordo ficha, esey t'e number cu ta wordo usa ora tuma tur dato di un sosoechoso. E.o. a saca potret di sosoechoso y tambe tuma vinger prints.

E detenidonan aki ta wordo sospecha e.o. di a comete atraco arma, forsa turista lanta placa bou menasa etc etc.

Mirando cu nan ta wordo considera peligroso, algun di nan a baha for di e van di CEA den boei na man y na pia.

Un detenido a manda un mensahe. E homber aki Rigo F. a wordo deteni na Papayastraat durante un inval den oranan di madrugada siman cu a pasa. El a pidi prensa presenta pa manda un mensahe pa Christopher R (yiu di su ex pareha), cu segun Rigo F. t'esun cu a bay cu auto pa comete atraco. Cu otro palabra e no tabata sa kico nan a bay haci cu su auto.

Esaki ta imagennan capta momento cu e detenidonan a yega y momento cu nan a sali bek.

Opinion

Kico t'e diferencia entre un pedofiel y un pedosexual?



ORA nos scucha casonan di muchanan cu a pasa den abuso sexual, mayoria biaha e stempel di “pedofiel” no ta keda atras. Abuso sexual di mucha ta un tema delicado.

Abuso sexual di mucha ta trece un avalancha di emocion cerca nos, pero e ta un tema cu nos no por sconde p’e. Mas grandi e tabu, mas halto e obstaculo pa raporta sospecho di abuso sexual di mucha.

Menos nos sa tocante abuso sexual di mucha, mas dificil e ta bira pa preveni esaki. P’esey e ta importante pa comunidad di Aruba ta consciente tocante e tema di abuso sexual di mucha.

KICO TA PEDOFILIA?

Pedofilia ta un preferencia sexual. Un pedofiel ta un persona adulto cu tin atraccion sexual pa mucha. Un pedofiel mayoria biaha lo gusta mucha cu ainda no a yega pubertad, es decir muchanan cu ainda no a desaroya pecho, crecimiento di cabey na parti intimo y cu ainda stem no a cambia.

Algun pedofiel lo tin preferencia pa mucha so y tin pedofiel cu lo tin preferencia pa tanto mucha y adulto.

KICO T’E DIFERENCIA ENTRE UN PEDOFIEL Y UN PEDOSEXUAL?

Pedofilia hopi biaha ta wordo confundi cu pedosexualidad. E hecho ta cu, pa con fastioso e por zona, un persona pedofiel no necesariamente lo mishi cu un mucha.

Apeser cu un persona tin atraccion y deseo sexual pa un mucha, pero e no mishi cun’e, esaki ta haci cu e persona no a kibra niun ley (aunke su pensamiento y gusto ta in-moral y no aceptabel).

Ora un persona mishi inapropiadamente cu un mucha, nos lo papia e ora di comportacion di un pedosexual.

E persona aki SI a comete un acto castigabel. Dus un persona cu en realidad mishi of haci actonan sexual, cu penetracion of no, ta un pedosexual.

E diferencia mas grandi ta, pa nos ta mas claro, cu pedofilia ta un sentimiento. No tur pedofiel lo actua riba e sentimentonan aki.

Tin pedofiel cu lo ta consciente cu esaki no ta permitibel como cu e ta un abuso di mucha. Tin pedofiel cu por controla e sentimentonan aki. Pero si un pedofiel actua riba e sentimentonan aki y abusa sexualmente di un mucha, cu penetracion of no, nos lo papia e ora di un pedosexual. Y abuso sexual contra un mucha ta castigabel.

E PROFIEL DI UN “ABUSADOR” TA VARIA

Tin ora nos sa pensa cu casonan di abuso sexual ta wordo cometi dor di un persona desconoci, pero di 90% di e casonan di abuso sexual di mucha, e mucha sa ken e “abusador” ta.

Un persona cu ta abusa sexualmente di un mucha no necesariamente ta un pedofiel. Segun un investigacion di un centro di experticio na Hulanda tin un indicacion cu di e 90% di e casonan, solamente 30% di e “abusador” ta un pedofiel.

Esaki ta indica cu 70% di e “abusadornan” no tabatin un preferencia sexual pa mucha. Al contrario e abuso a wordo cometi dor di personanan cu NO ta un pedofiel.

>>>

<<<

ABUSADORNAN OPORTUNISTA

Abuso sexual por wordo cometi dor di abusadornan oportunista tambe, of gelegheidsplegers, esaki NO kermen cu nan ta un pedofiel.

E abuso mayoria biaha no ta plania, pero e ta wordo cometi pa motibo di cierto circunstancia, cu ta duna e abusador chens e momento ey pa abusa di un mucha.

P.e. si un mucha ta na cas of riba caya sin supervision, si e abusador ta bou di stress of otro emocionnan fuerte manera rabia. Si un persona abusa sexualmente di un mucha den seno familiar e ora aki ta trata di incest, p.e. dor di un omo/tanta, welo/wela, tata/mama, ruman, etc.

ABUSADORNAN ASOCIAL

Tin ora personanan cu no por forma un relacion (amoroso) saludabel, cu tin poco empatia y no por hinca nan mes den sapato di otro tambe por yega na haci abuso sexual contra un mucha.

Ta trata di personanan cu tin problema di conducta y rabia riba e comunidad. Tin ora e personanan aki por tin rabia especificamente riba hendenan muher.

E tipo di abusador aki lo por yega na abusa di un mucha como cu un mucha ta fragil y inocente. E tipo di abusador aki hopi biaha ta opta pa abusa di un mucha desconoci y na un manera hopi violento.

E tipo di abusador aki ta wordo caracteriza como un recidivista, es decir un persona cu lo keda comete e acto castigabel aki. E combinacion entre un deseo sexual (libido) halto, un impulso halto y un consenshi abou tambe por haci cu un persona por yega na abusa sexualmente di un mucha.

ABUSADORNAN CU UN HISTORIA DI ABUSO SEXUAL

Personanan cu a experiencia algun trauma, p.e. abuso durante nan infancia, tambe por abusa despues di un mucha. P'e motibo aki ta importante pa tur mucha haya e guia necesario ora nan pasa den abuso (sexual).

Nos tin cu corda cu abuso sexual tambe por pasa entre menornan mes. Muchanan tambe por abusa sexualmente di otro muchanan. Ta bon pa ta consciente di



esaki y ekipa nos muchanan cu tools necesario pa por para pa nan mes y pone limite.

P'e motibo aki educacion sexual ta necesario di chikito caba.

PAKICO E TA IMPORTANTE PA DIFERENCIA E TIPO DI "ABUSADORNAN"?

Nos sa cu e articulo aki no tabata nada facil pa lesa, pero e ta importante pa trece temanan asina padilanti. Nos lo kibra e tabu solamente si nos papia di dje y asina nos lo proteha nos muchanan tambe.

Cu e articulo aki nos kier a trece dilanti cu no solamente pedosexual ta abusa sexualmente di mucha. Maske cu casonan di abuso mayoria biaha ta wordo cometi dor di un ser masculino, nos no mester descarta e hecho cu hende muher tambe por abusa sexualmente di un mucha.

Semper mester tene cuenta cu e sexualidad, competencia social, habilidad cognitivo, grado di agresion, proceso di grooming y problemanan di relacion di e sospechoso. Tambe mester tene cuenta cu e circunstancianan bou di cual e delito a tuma lugar, paso no ta solamente sentimiento di pedofilia ta conduci na abuso sexual di mucha. Mas conocimiento nos tin di e topico, mas mihor nos lo por preveni abuso sexual di mucha.

Si bo tin pregunta of ta desea di sa mas informacion tocante abuso y negligencia di mucha yama Fundacion Respeta Mi na 582-4433

Si bo ta sospecha cu un mucha ta wordo abusa den un forma of otro of bo ta desea di raporta un caso di abuso, yama meldpunt nacional di Aruba: Bureau Sostenemi na 588-1010.

Accidente serio na Cura Cabay diabierna anochi

Un chauffeur deteni y un a keda pega den auto

DIABIerna anochi Polis y ambulance a ser manda cu urgencia dilanti ex cas di Wilfred Ho Sing Loy, pa un accidente di auto serio.

Informacionnan na prome instante a papia cu lo tin 3 auto involvi. Berdad tabatin 3 auto involvi, solamente cu 1 di nan un Hyundai Accent tabata staciona dilanti e cas.

Segun testigonan, e pick up tabata bayendo direccion San Nicolas cu velocidad halto, y parse cu un poco mas pabou den area di Cura Cabay Store e lo a dal of hera dal un auto. Di e manera eynana el a sigui pasa auto, y ta topa cu e Hyundai Accent bayendo direccion Savaneta.

Esaki a causa un impacto duro ora nan a dal frontal. Durante cu e autonan a zwaai e Hyundai Accent a bay dal un otro Hyundai Accent staciona dilanti e ex cas di Ho Sing Loy.

Materiaalwagen di Brandweer mester a sali di post Sabana Berde direccion Cura Cabay, pa libera e chauffeur cu a keda pega.

Bomberonan a traha basta liher y a sa di saca e chauffeur den un tempo cortico. Mientrastanto Polis a detene e chauffer di e pick up, sospecha di tabata coriendo auto bou influencia. El a wordo poni den boei y prome cu nan a hibe Warda di Polis pa test a laga Paramediconan controle, debi cu tabata trata di un impacto duro.

Na warda e lo mester bay pasa test riba e machine grandi, y asina Polis lo haya sa cuanto alcohol el a bebe.

Chauffeur di e Accent a wordo saca di e auto y poni den Ambulance, unda nan a sali despues cune pa Hospital.



Accidente na Tanki Flip

DIABIERNA mainta Polis di Trafico y tambe companianan di seguro a bay un dalmento na Tanki Flip. Esaki a sosode panort di e rotonde. Tabata trata di 2 vehiculo.

Causa di e dalmento tabata momento cu e chauffeur di un Mitsubishi Montero a bay haci un U-Turn.

Posiblemente e no a pone atencion y ta dal un Nissan March, lagando bastante daño material atras. Loke tabata mas importante cu ningun persona a resulta herida.



Dalmento di cadena diabierna atardi na Ponton

DIABIERNA atardi Polis y ambulance a bay Ponton, un poco mas panort di WEMA unda un accidente den cadena (kettingbotsing) a sosode.

Na yegada Polis a topa cu e vehiculonan. Esun mas dilanti tabata un Mazda SUV, e di dos tabata un Hyundai i10 y e ultimo tabata un Mini Cooper.

E Mazda pa un of otro motibo a sera brake, y esnan patras no a pone atencion y ta causa e dalmento den cadena.

Durante e impacto esnan den e vehiculonan lo a sinti nan nek y tabata sinti un poco dolor. Y tabata p'e motibo aki cu a pidi asistencia di Paramediconan pa controla e ocupantenan. Segun nos a compronde, nada di gravedad.



Colegio Conrado Coronel t'e skol ganador di Hofi Amistad 2019

DIABIERNA tabata un dia sumamente special pa Sector Primario y Enseñana di Aruba. Di un manera sorpresivo Ministernan Chris Romero y Rudy Lampe, hunto cu un delegacion di Santa Rosa/DLVV, a yega na Colegio Conrado Coronel pa oficialmente anuncia cu e skol aki t'e ganador di Santa Rosa su prome Hofi Amistad.

Cu e pensamento di inculca den nos muchanan e cultura di plantamento for di edad tempran, Departamento di Agricultura, Cria y Pesca/Santa Rosa, a bin cu e iniciativa di e proyecto Hofi Amistad.

Hofi Amistad ta un proyecto caminda Santa Rosa ta incentiva e skolnan basico na Aruba pa ta mas activo den plantamento, cu e meta pa ta mas auto-suficiente ora ta trata cuminda.

Tur skol basico a wordo invita pa participa den e proyecto Hofi Amistad, y pa cu esaki cada scol mester a manda un opstel indicando con nan ta imagina e hofi di nan skol.

E opstel ganador di e aña aki tabata esun di 4de klassen di Colegio Conrado Coronel.

Santa Rosa lo guia y yuda den e creacion di Colegio Conrado Coronel su Hofi Amistad. Esaki lo tuma lugar na cuminsamento di aña escolar 2019/2020. "E ta mi deseo pa aki 1 aña nos por mira e frutonan di e cosecha di boso Hofi Amistad", tabata palabranan di Minister Chris Romero na ocasion di premiacion di Hofi Amistad.

Minister Romero a felicita e alumnonan di e 4de klassen di Colegio Conrado Coronel cu a hinca un opstel asina bunita y inovativo den otro.

"Boso ta un ehempel pa alumnonan di otro skolnan sigui. Mi gradicimento n'e cabesante y docenanan di Colegio Conrado Coronel p'e entusiasmo cu a brinda pa cu e proyecto Hofi Amistad", Minister Chris Romero a finalisa bisando.



Bishita Diplomatico di Minister Juan Antonio Prieto, Consul General di Peru di Panama na Aruba



MINISTER Juan Antonio Prieto, Consul General di Peru na Panama a realisa un bishita diplomatico na Aruba diana 9 y 10 di mei 2019. Cu e bishita aki lo beneficia comunidad Peruano na Aruba pa regla nan documentonan personal tanto como pasporte, cedula di identificacion, como tambe poder nan notarial y otronan di caracter legal.

Tur esaki durante diahuebs 9 y diabierna 10 di mei na hotel 'Talk of The Town' riba L.G. Smith Boulevard.



E oficial diplomatico di Panama a acepta y cumpli cu un bishita protocolar di e Fundacion Fiestas Patrias di Peruanos na Aruba na unda a ricibi un documento describiendo memorianan di asuntonan realisa na Aruba.

Gestion di Maneho y Tratonan di e Institucion mas activo na Aruba. Tambe nan proyectonan na corto, mediano y largo plazo cu ta duna honor n'e cuestionnan cultural, turistico, civico y patriotico di Peru na Aruba.

Nan presentacion a ser ricibi y acepta cu gran agradecimento y felicitacion pa nan trabaounan di hopi esfuerso realisa p'e institucion na Aruba.

Masha pabien Fundacion Fiestas Patrias Peruanos na Aruba...!



Hersengymnastiek Divi Resorts



DIVI Resorts recientemente a organisa un hersengymnastiek den cua 10 team yena cu entusiasmo a participa. Teman an durante e evento aki tabata:

Historia di Aruba, Divi facts, historia mundial, strik vragen y algun actividad di Team Building.

Team ganador di e anochi ki tabata:

Dushi Yui di Tamarijn; di dos lugar a keda Human Resources Brainiacs y Pink Panthers di Divi Phoenix Sales; di tres lugar a keda pa Tur cu Tin di Divi Village.



Campeonato Fast Pitch di ASB a continua

Black Joker ta knock out The Prodigies den prome wega di A-Klas di 2019

CAMPEONATO Fast Pitch di Aruba Softball Bond dedica na baluartenan Jacobo Jansen y Gilbert “Nando” Maduro a continua riba veld di Dragon Hitters na Barcadera. Bon asistencia di publico cu un bon ambiente e equipo di Black Joker a manda un señal cla den su prome wega. Black Joker no a respeta e veterano leyenda Antonio “Tony” Warner, kende ainda ta contruibuyendo den deporte di softball den A-Klas propinando Tony asina su prome derota.

Tony Warner a tira 32 bola, 44 strike bon pa 76 lansamento propinando 4 ponche y ta regala 3 base por bola permitiendo 6 hit. Hector Winterdal ta releva 2/3 parti den di 4 inning ta lansa 30 bala, permitiendo 6 careda limpi y 4 hit.

Mihor bateadornan pa Black Joker ta Oslin Bergrok di 4-4 cu 4 rbi y 3 careda anota mas un homerun, Bryan Courtar 3-2, Juan Carlos Maduro y Danilo Croes di 2-1.

Pa The Prodigies e unico hit a wordo bati pa Albert Croes, kende porcierto a anota tambe e unico careda. Campeonato ta continua awe dialuna 13 di mei na Pos Chiquito unda pa 7.15pm den A-Klas Blackhawks lo enfrenta Piratas, mientras pa 9pm Royal Power lo topa Celebrities e equipo cu a titular campeon 2018 den A-Klas, kendenan a subi pa AA. Campeonato Fast Pitch a la carga!!!



Campeonato HEINEKEN fast pitch di Aruba Softball Bond a continua

Sputers MIPA ta derota Macuarima Spark Elektra den AA

CAMPEONATO Heineken fast pitch di Aruba Softball Bond dedica na baluartenan Jacobo Jansen y Gilbert “Nando” Maduro a continua riba veld di Dragon Hitters na Barcadera. Den categoria AA e dos rivalnan Sputers MIPA di Sabana Grandi a topa e muchanan di Macuarima Spark Elektra.

Sputers bou maneho nobo di e legendario Johannes Poy Flanegin e aña aki a Sali y muestra cu mester tene bon cuenta cu nan. Doño di equipo Sputers MIPA Sr. Henk Arnold a dicidi di lanta un equipo nobo “White Joker” y e aña aki Henki lo keda A-Klas pa desaroja muchanan pa su farm system. Angelo Arnold a start pa Sputers MIPA y a cubri henter e ruta pa pone e promer victoria riba su number. Juan Chirino tambe a bay ful e ruta pa Macuarima pero mester conforma su mes cu e derota.

Mester remarca cu Sputers a rally den promer inning acompaña pa dos error y a anota 5 careda y di eynan Chirino a preta brasa y no a permiti mas careda.

Sputers como equipo a bati di 22-4 pa un averahe di 182. Macuarima como equipo a bay di 19-4 pa un averahe di 211. Sputers MIPA 5 careda, 4 hit, 0 error. Macuarima Spark Elektra 2 careda, 4 hit, 3 error. Angelo Arnold ta tira 30 bola, 47 strike pa un total di 77 lanzamiento permitiendo 2 careda limpi propinando 5 ponche crema y ta



regala 2 base por bola pa un era di 2.80. Juan Chirino 22 bola, 55 strike bon pa 77 lanzamiento permitiendo 2 careda limpi propinando 4 strike outs y no ta regala base por bola pa un era di 2.80. Pues un pitcheo hopi balansa pa ambos banda.

Mihor bateadornan pa Sputers MIPA ta Reison Alvarado, Alexander van de Berg y Gerald Werleman tur di 2-1. Gerald ta conecta porcierto un triple. Deyon Peterson a bay di 3-1. Pa Macuarima Spark

Elektra Edgard Flanegin, Ray Bernabela ambos di 3-1, Leonard Geerman di 2-1 y Randolph Pinedo di 1-1. Dialuna awor campeonato ta continua na Pos Chiquito cuminando pa 715pm den categoria A-Klas Blackhawks lo topa Piratas mientras pa 9pm den categoria AA Royal Power lo midi forza contra campeón di A-Klas 2018 kendenan a promove pa AA esta e muchanan di Esy Kelly Celebrities. Fanaticada di softball jega tereno bin apoya bo equipo preferi!!!



Drenta su portanan cu gradicimento,
drenta su tempel cu cantica di alabansa,
glorific'e, bendiciona su Number.
Salmo 100:4

Cu dolor na nos curason pero conforme cu boluntad
di Dios, nos kier anuncia fayecimento di nos casa,
tata, welo, ruman, omo stima:

**Alfred
Nicasio Tromp**

Mihor conoci como "Freddy"
*14-12-1946 - †07-05-2019



Na number di su:
Casa stima: Elda Tromp-Croes

Yiunan:
Jahir Tromp
Gregory Tromp

Nietonan: Gilliam Tromp
Dilan Tromp y su mama Leydis Concepcion

Tata: †Nicolas Tromp

Mama: †Petra Tromp-Tromp

Rumannan:
Mercedes y Lucas Bergen-Tromp
†Leo y Clea Weller-Tromp y famia
Luis y Ingrid Chehin y famia
†Ilerena y Chito Kelly-Tromp y famia
†Eddy Tromp
Magriet Tromp
Gala y Mario Kelly y famia
Esther y Hubert Inocencia y famia
Maria Tromp y famia
Verly Tromp y famia
Elvis Tromp y famia na Hulanda

Suegronan: †Carlos y †Henita Croes-Croes

Swa y cuñanan: Mary y Rufo Solognier y famia
Edna y Rolando Garcia y famia
Dientje y Humberto Nivilac y famia
Erwin y Jenny Croes y famia
Maria Croes y famia
Lucia y Reynaldo Rekwest y famia

Iha: Steve Croes
Omo y tantanan, sobrino y sobrinanan, primo y
primanan

Amigonan di cas: Elton, Fedly, Roy y Andres Giel

Amigonan di Valero Sta. Cruz, bisinanan, amigonan y
conociman y

Demas famia:
Tromp, Croes, Bergen, Weller, Chehin, Kelly, Inocen-
cia, Chang, Diaz, Bergstra, De Windt, Oduber, Davis,
Hoek, Zievinger, Estrada, Vrieswijk, Rijn, Solognier

Ta invita pa e acto di despedida cu lo tuma lugar
dialuna 13 di mei 2019 na Aurora Funeral Home di 2'or
pa 4'or di atardi, suigi pa acto di cremacion.

Nos disculpa si den nos tristeza nos por a lubida algun
famia.



Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Cu inmenso tristesa na nos curason nos ta anuncia
fayecimento di nos mama, wela, ruman, tanta y
madrina stima:

**ANTONIA
INNOCENTIA
FARO**

Cariñosamente yama: "NANA"
*28 juli 1947 – †8 mei 2019



Na number di su mayornan:
† Higinio y Anna Faro-Semeleer

Yiunan:
Ghislaine Dabian y Archie Tromp
Daymond Dabian y Lilly Dirksz
Julisa Dabian y Alejandro Reyes

Nieto y nietanan:
Kylan Dabian
Jélixie Bislip
Dyron Dabian
Jesszady Dabian
Arziany Tromp
Cheydeah Ignatia

Rumannan:
Theresita Kock-Faro, Betto, yiu Anthony y famia.
Irena Dijkhoff-Faro, +Freddy, yiunan Ethleen, Gina,
Ralph y famia.
Isnardo 'Chonay' Faro, Petra, yuinan Jorge, Juni y
famia.
Ursula Faro y yiu Yoana.
†Pablo Tromp, Stefanita, yiuinan y famia.

Subrino y subrinanan, primo y primanan, amigo y
amiganan, comer y compernan.
Su amiganan:
Olivia, Francia, Mena Croes, Thelma, Mena, Vilma,
Mechi y Bertha.

Un danki enorme ta bay pa su querida bisiña dokter
Benita Britt-Croes y sigur un danki inmenso na Dokter
Cuba, dokter Choudry y afdeling Dialyse na HOH.

Demas famia: Faro, Dabian, Semeleer, Franken,
Tromp, Dirksz, Kock, Dijkhoff, Bislip, Schwengle, De
Cuba, Simileer, Figaroa, Ignatia, Infanzon, Arends,
ex-coleganan di Wulfsen & Wulfsen y demas famia,
bisiña y conociman.

Nos ta invita pa asisti na e acto di entierro cual lo tuma
lugar diaranson 15 mei 2019 na misa Sta Anna na
Noord di 2or pa 4'or di atardi. Despues lo sali pa
Santana Catolico na Noord.

Occasion pa condolencia ta na Aurora Funeral Home
diamars 14 mei 2019 for di 7:00pm-9:00pm.

Nos disculpa si den nos tristesa nos por a lubida un
famia.
Na lugar di flor of krans nos ta aprecia un donacion pa
"Fundacion Cas Marie".

**Detencion relacioná cu
ladronisia cu violencia**

WILLEMSTAD - Relacioná cu
un caso di ladronisia cu violencia, cu
a tuma lugar dia 15 di febrüari 2019,
na un minimarket den área di Beurs y
na Baya Beach, e investigacion den e
casonan aki a continuá. Diabièrnè 10
di mei ultimo, alrededor di 19.13or di
anochi, riba òrdo di Ministerio Público
Rechèrchenan di Atraco Team a detené
e hòben sospechoso **J.J.de.W.**, **nacé na
Còrsou di 15 aña di edad**, en conex-
ion cu e casonan ariba mencioná.
A presentá e sospechoso dilanti di un
Fiscal auxiliar, kende a ordená su en-
carcelacion pendiente di mas investiga-
cion.



Señor ta mi wardador mi no tin falta di nada den
cunucu di yerba berde e ta pone mi sosega. E ta
hibami na awa tranquil pa mi bolbe haña forsa.

Cu dolor na nos Curazon pero conforme cu boluntad
di Senjor nos ta anuncia fayecimento di nos Ruman y
Tanta stima:



Thomasa Farro
mihor conoci como Toma

Na number di su:
Rumannan:
Petra de Jongh y famia
Vda. Felepina Tromp y famia

Sobrinonan stima:
Nelson de Jongh
Daniel Farro

Demas sobrino y sobrinanan y famia, tur su prima y
primonan, comer y compernan y tur su amiga y
amigonan y verpleesteman di St Micheal Paviljoen.

Demas famia: Farro, Figaroa, Franken, de Jongh,
Dubero, Wester, Tromp.

Ta invita famia y conociman pa acto di entierro cu lo
tuma lugar dialuna 13 mei 2019 di 2or pm pa 4or pm
atardi na Parokia di St. Anna na Noord.

Despues lo sali pa Santana Catholico na Noord.
Si acaso den nos tristesa nos por a lubida un famia
nos ta pidi nos disculpa.

Nos ta lamenta cu después di entierro nos no por recibi
bishita di condolencia na cas.

Entrada hudicial cu detencion



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

Nos ta anuncia fayecimento di



Hernandez Heide

*09-08-1946 - †10-05-2019

Acto di entierio lo wordo anuncia despues.



Señor ta mi wardador mi no tin falta di nada den
cunucu di yerba berde e ta pone mi sosega. E ta
hibami na awa tranquil pa mi bolbe haña forsa.

Cu dolor na nos Curazon pero conforme cu boluntad
di Senjor nos ta anuncia fayecimento di:



**Faustina Maria
Tromp-Boekhoudt**

mihor conoci Maria, Machi

Acto di entierio lo wordo anuncia después.

WILLEMSTAD - Diabièrnè 10 di mei 2019, alrededor di 15.15or, Team di Mantencion di Órden Público a tene un entrada hudicial den un cas na St. Maria y a haci un detencion.

En conexion cu un control cu tabatin riba un auto y a haña e chofer cu un paki di cocaina. Continuando cu e investigacion a haci un entrada hudicial caminda el a cumpra esaki.

Durante di e control n'e cas a haña y a confiscá 110 paki di cocaina cla pa vende.

N'e sitio a detené e hòmbler **N.E.M., di 59 aña di edad, nacé na Còrsou**, pa violacion di ley di Opio.

A presentá e sospechoso dilanti di un Fiscal auxiliar kende a ordená su encarcelamento pendiente di mas investigacion.

Dios ta mi Wardador,
mi no tin falta di nada
Nos ta anuncia fayecimento di



Aloysio Marcolino Franken

Mihor conoci como Djiespie
Lid in de Orde van Oranje Nassau

Na number di su esposa: Cecilia Franken-Geerman

Yiunan: Susie Franken y Alwin Croes
Lisette Franken
Mabilene Franken y David Kock

Nietonan stima: Stacey y Julie Croes.

Rumannan: Elga Croes
Rubert y Jacky Croes
Willem y Amparo Croes
Oswald y Glenda Croes
Ingrid Croes y Jaime Coeriel
Oslin Croes na Hulanda
Anna, Freddy Cesar, Tina, Shonwe y Mario Stede

Swa y Cuña: Casimiro y Margarita Geerman

Sobrino y sobrinanan, primo y primanan y
tur su amigonan mucho pa menciona.
Y sin lubida tur amigo di Djiespi'e Place

Acto di entierio lo wordo anuncia despues.

Caso di duo Soerka y Isenia tratá den sala di corte diabierna

WILLEMSTAD - E dos ciudadanonan Glenston Soerka di 29 aña di edad y Trisha Isenia, entre tanto 18 aña di edad, su Casonan a keda tratá diabierna den sala di corte y a dura bastante largo, di mitar di 10 te despues di 12or di mèrdia ainda e Caso tabata full den tratamiento, como tal sentencia lo ta 29 di mei pa cuarto pa 2. Hues mr. Mauritsz de Kort a precidí e seccion aki, siendo na nòmber di Ministerio Público tabatin fiscal señora mr. Clarelli Hato-Willems, anto como defensa abogado señora mr. M.C. Verkade. En realidad ta trata di vários Caso di atraco cu como protagonista prinsipal Glenston Soerka, un bon conosí di hustisia, kende ya for di su 17 aña ta activo den e campo di criminalidad, tirando atraco, pero entre tanto a logra trèk su frei menor di edad, Trisha Isenia bay cune den su hazañanan. Ta trata e biaha aki di atraco cu a tuma lugá dia 13 di juli 2018, hòrtando pickup marka Chevrolet, bòternan di Whisky, White Label, Johnny Walker, Black Label, pero tambe cámara di saca pòtrèt, vários tipo di holoshi, CD player, telefon mobile, e suma di placa di 375 florin, tur esaki pèrteneciendo na un persona di fam Zonenschain.

E atracadó a menasá cu arma di candela, bati e victima y maltrat'é den su cas, mara e persona na man, na pia y cara, listra e persona na su curpa pa despues kita su propiedadnan fo'i dje. E victima mester a sigui tur instruccion di e atracadó, sinta bon mucha riba stupi wak kico ta pasa cune, laga kita e alarma for di funcion, soportá cu ta ranka holoshi for di su man etc. E siguiente atraco brutal di e duo a tuma lugá dia 15 di juli 2018 na Coral Estate riba famianan di fam Niepoth y Ekelschot, caminda a logra kita un lista largo di propiedad di e victimanan aki entre cual 3 Ipads, 3 adapter, cargadó di telefòn, holoshi, notebook, vários holoshi, vários Iphone, mashin di bora, tas di computer, television, armband, cámara di saca pòtrèt, sumanan di placa di USD 3035,50 plùs USD 500, plùs sumanan di Naf 900,00, mas e suma di Naf 1000,-- rijbeweis y tarhetanan di banconan MCB, ING, Rabobank y funmiles, pòtmòni, cabelnan di computer, mashin di bora, pickup di marka Ford. Aki atrobe Glenston Soerka cu su cara tapá a aplicá prácticanan di violencia, menasando cu arma di candela, manda e victimanan drumi plat abou na suela, marando e hendenan aki na man y pia, grita pa intimidá nan, dal un of mas di e victimanan cu moketa den cabes benta largo abou na suela, pero tambe bati nan cu skòp den curpa y den lomba. Danki na recursonan moderno awendia, e denunsiente por sigui su



Mac Book hòrtá y a bin sa cu esaki ta na e adrès Caya Irena Schoop aya na Barber, di manera cu polisnan por a djis bay na e sitio. Hasiendo investigacion den e cas a reis tambe riba otro artefactonan hòrtá na Coral Estate.

Fiscal señora mr. Carelli Hato Willems a presentá debidamente documenta den sala di corte diabierna demostrando cu e figura principal den e actonan castigabel aki ta Glenston Soerka, pero su cómplise Trisha Isenia mas bien ta su frei cu el a logra lastra bay cune y hinka den su fechorianan. E acusado Glenston Soerka tin un trayectoria largo di actonan criminal cometé, pero awor a logra jòin su frei, menor di edad, esta Trisha Isenia den su actonan. E acusado Trisha Isenia natural a saca probecho di e ladronisianan cometé pa Glenston Soerka, pero ta siguiendo instruccionnan siegamente di e protagonista prinsipal aki.

E actonan cometé ta mará na diferente prosèsverbal di declaracionnan cu e acusadonan a haci, nengando di a tira atraco y òf cu a haya e artículonan abou den mondi y na otro sitio. Esaki ta un Caso cu a demostrá claramente con criminalidad por sigui crese, curti y cohe forman spantoso, no opstante intervencion di instancianan profecional manera Jeugdreclassering, sikólogo, sikiater y lo demas. Fiscal mr. Clarelli Hato Willems a demandá un castigo di prizon di 8 aña pa e baké den criminalidad Glenston Soerka, kitando e temporada cu esaki a pasa den aresto preventivo. Pa e cómplise Trisha Isenia, kende ta un firstoffender y cu ya tabata 70 dia encarselá pa e Caso aki, fiscal a limitá e demanda na un castigo di prizon di 360 dia di cual 290 dia condicional y guia di parti di Jeugdreclassering. Esaki ta nificá cu Trisha Isenia lo no tin nodi di dreña prizon atrobe pa e mesun Caso aki. Hues mr. Mauritsz de Kort a keda di bay studia e Caso aki completo pa dia 29 di mei dicta sentensia.

Curtley Basilia acusado den Caso di Hatoshooting den sala di corte diabierna, estilo proforma



WILLEMSTAD - Fiscal señora mr. Carelli Hato tabata por la goma diabierna, atendiendo vários Caso grandi. Tambe esun di e acusado Curtley Basilia di 32 aña di edad. E ta sospechá di a paga agente policial Xavier de Windt un suma di placa pa duna informacion tokante Erwin 'Djais' Juliana, kende despues a keda asesiná cruelmente na su yegada for di exterior (Alemania) cu avion di Airberlin na aeropuerto Hato dia 15 di juli 2014. E asesinato aki ta parti di gueranan tenas entre gèngnan criminal na Còrsou, esta No Limit Soldiers (NLS) y Buena Vista City (BVC) y cu a culminá den seftamento di Erwin "Djais" Juliana y Shentley "Champi" Arnhem. Pero tabatin vários otro persona inocente cu a haya bala e dia ey. Segun fiscal Clarelli Hato-Willems diabierna den sala di corte, Curtley Basilia a hasi e palabracion cu agente polisial Xavier de Windt na Sint Maarten. E polis aki cu ya ta cerá na Hulanda, despues di a keda sentenciá, pa su acto castigabel cu el a cometé di pasa informacionnan confidencial tocante e buelo di Airberlin pa Còrsou, a bisa cu ta Curley Basilia a dun'é e encargo pa buska informacion contra pago di e suma di 50.000 florin. En realidad ta solamente e suma di 35.000 florin Xavier de Windt a ricibí cu cual el a compra un auto. E tiradónan involv tabata Judrin 'MOB' Martis, Adriaan 'Poison' Martha y Raily Bart, kendenan tur a keda gará y sentenciá. E

acusado Curley Basilia, cu ta esun cu a busca y a duna informacion di skema di buelo, sinembargo despues djei a hiba un bida di fugitivo. El a biba un temporada na Santo Domingo, pero a biaha pa Hulanda, caminda cu intervencion di Interpol nan a gar'é aña pasá y logra entreg'é na autoridadnan na Còrsou. Curley Basilia diabierna den sala di corte a declará cu e ta tata di yunan di 10, 8 y 2 aña di edad.

Abogado encargá cu e defensa di Curley Basilia, señora Marije Vaders a pidi pa laga su cliente den libertad ya cu segun e abogado e investigacionnan te ainda no a duna pruebanan contundente. Fiscal mr. Hato Willems sinembargo a referí detayadamente na declaracionnan incriminatorio di agente policial de Windt, e palabracionnan cu esaki a hasi cu Basilia, e placanan cu de Windt a ricibí y otro fuentenan importante pa muestra seriedad di e acusacionnan. Hues mr. Mauritsz de Kort a rechasá e peticion pa libertad temporalmente, pero mesora a yama atencion pa e hecho cu tratamiento di e Caso aki riba contenido lo ta dia 19 di juli binidero. Remarcabel ta cu no tabatin masha famia di e victimanan presente diabierna den sala di corte, aparentemente tin un di e famianan hopi yegá di un di e fayeridonan cu ta sufri di e malesa Alzheimer, como tal lo no por ta presente na ocasion di tratamentu di e Caso aki próximamente.

Hulanda a bolbe ripiti:

Cada pais di Reino ta responsabel pa su maneho di Migracion

WILLEMSTAD. Den un Carta cu e Secretario di Husticia y Siguridad Hulandes Mark Harbers a manda pa parlamento Hulandes e siman aki, e ta informa presidente di parlamento Hulandes cu cada pais cu ta forma Reino Hulandes ta responsabel pa nan maneho y e forma cu nan ta ehecuta nan maneho di migracion.

Minister Mark Harbers a confirma cu maneho di migracion ta y ta keda un asunto y responsabilidad di cada pais den reino y e organisacion di boluntario ACVC a constatá esaki tambe.

Esaki ta enserá cu tur pais den Reino ta obligá pa cumpli cu e tratado Europeo pa Derecho Humano cu ta prohibi tratado inhumano. Esaki ta nifica entre otro cu deportacion di un migrante ta prohibi si e deportacion aki ta enserá un risico real cu dictadura lo aplicá tortura of trato inhumano.

Secretario di Estado Harber ta insisti cu mester aplica y respetá e reglanan di Derechi Humano completamente y ta cumpli cu acuerdonan internacional.

E detaye aki ta un condicion importante pa e asistencia cu Hulanda ta duna a base di artikel 36 di Statuut pa asistencia y yudansa.

Cumplimento di e reglanan aki ta responsabilidad di Hulanda ya cu Boneir ta un munisipio Hulandes.

BON COPERACION

Durante añanan cu a pasa a forma un bon coperacion entre autoridatnan di Hulanda cu autoridatnan di Aruba y Corsou riba tereno di duna asilo y migracion.

E petitionnan pa asistencia y asistencia for di Aruba y Corsou na Hulanda ta ofrecé e oportunidad pa intensificá e coperacion aki y hasié mas amplio.

Gobierno Hulandes a informá su parlamento caba cu Hulanda ta duna asistencia techniko den creacion y in-

stalacion di facilidad y proseduranan den e cadena pa acomoda straño.

E Secretario di Estado Hulandes a anuncia cu Gobierno Hulandes lo organisá curso y training pa funcionarionan por atendé cu migrante y duna e servicio cu nan meresé.

Cu e asistencia cu Gobierno Hulandes duna, automaticamente nan ta duna un contribucion na perfeccioná e prosedura di haci peticion pa admision, peticion pa proteccion, y pa mehorá e sistema di identificacion, registrá y (macia importante) tin tur documento cla ora e migrante tin cu retorna su pais.

Un bentaha adicional balioso cu e sistema aki ta produci ta cu e ta crea un base solido pa e proseso basico dje cadena di maneho di strañeronan na Corsou y Aruba. (Straño cu nan no ta mencioná Sint Maarten. Red.).

Islanan BES tin un cuadro huridico solido caba con nan maneho di migracion ta funciona.

Den e lunanan binidero nan ta analisá riba ki parti mester adaptá ley di straño y regla ne islanan di Hulanda den Caribe pa promové un sistema administrativo y di prosedura eficiente den e munisipionan ey.

NO TA ACCEPTA ASISTENCIA

E organisacion di boluntarionan ACVZ a ofrecé pa traha un rapòrt cu recomendacion riba proteccion y migracion internacional den cuadro di nos relacionnan den Reino y con Hulanda mester maneha e tema di proteccion internacional y migracion dje luho cu ta bin pa nos islanan.

Hulanda a dicide cu nan no ta hasi uso dje oferta aki pasobra nan tin e informacionnan nesesario caba den cas na diferente Ministerio di Gobierno Hulandes.



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL